



Sud Bosne i Hercegovine
Суд Босне и Херцеговине

Broj: S1 3 Iž 043726 22 Iž
Sarajevo, 18.08.2022. godine

Sud Bosne i Hercegovine u Sarajevu, u apelacionom vijeću sastavljenom od sudija Dinke Bešlagić-Čovrk predsjednika vijeća, Vesna Trifunović i Zvezdane Antonović članova vijeća, odlučujući o žalbi Mirzeta Mujkića iz ..., izjavljenoj protiv odluke Centralne izborne komisije Bosne i Hercegovine broj: 06-01-07-3-1041/21 od 02.06.2022. godine o utvrđivanju odgovornosti za kršenje odredbi Izbornog zakona BiH, u nejavnoj sjednici održanoj dana 18.08.2022. godine, donio je

RJEŠENJE

Žalba se odbija.

Obrazloženje

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je Mirzet Mujkić odgovoran što u 2020. godini nije Centralnoj izbornoj komisiji BiH podnio izvještaj o imovnom stanju u roku od 30 dana od dana prestanka mandata, čime je prekršio odredbu člana 15.8 stav 2 Izbornog zakona, te mu je na osnovu člana 6.7 stav 1 tačka 1 i 19.10 stav 1 tačka b) Izbornog zakona izrečena novčana kazna u iznosu od 500,00 KM.

Protiv ove odluke Mirzet Mujkić blagovremeno je podnio žalbu navodeći da je njegova odgovornost utvrđena u postupku koji nije pravilno proveden i da činjenično stanje nije pravilno utvrđeno. Smatra da odluka o visini kazne nije adekvatna težini izvršene povrede i da nisu uzete u obzir okolnosti da je ..., usljed čega ima poteškoće u izvršavanju svojih obaveza. Predlaže da se ožalbena odluka poništi i predmet vrati na ponovno odlučivanje ili da se ukine dio odluke o izrečenoj novčanoj kazni.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbena odluka donesena na pravilna i potpun način u skladu sa zakonom i podzakonskim aktima.

Žalba nije osnovana.

Prema stanju u spisu predmeta, Centralna izborna komisija BiH je uvidom u službenu evidenciju utvrdila da je žalitelju Mirzetu Mujkiću prestao mandat vijećnika u Opštinskom vijeću Dobij Istok i da nakon isteka mandata, do 15.12.2020. godine, nije podnio izvještaj o imovnom stanju.

Navedeno je bilo osnov da Centralna izborna komisija BiH, po službenoj dužnosti, Zaključkom broj 06-1-07-3-1041/21 od 15.12.2021.godine, pokrene postupak utvrđivanja odgovornosti žalitelja, zbog kršenja odredbe člana 15.8 stav 2 Izbornog zakona BiH, u kom postupku žalitelj, i ako uredno pozvan, nije dostavio izjašnjenje.

Izborni zakon Bosne i Hercegovine u odredbi člana 15.8 stav 2 propisuje obavezu izabranim članovima organa vlasti na svim nivoima da u roku od 30 dana od prestanka mandata na koji je izabran, Centralnoj izbornoj komisiji BiH podnese izvještaj o imovnom stanju. Radi se o imperativnoj zakonskoj normi, koja mora biti poznata izabranom članu organa vlasti. Nadalje, zvaničnik koji je sposoban za preuzimanje izborne funkcije prema svim svojim svojstvima mora biti sposoban i za izvršavanje dužnosti koje u vezi sa tom funkcijom, zakon propisuje. Stoga nema značaja navod žalbe da su invalidnost i zdravstveno stanje spriječili žalitelja u izvršavanju obaveza.

Odlučujući o visini novčane kazne za povredu zakona za koju je žalitelju utvrđena odgovornost Centralna izborna komisija BiH pravilno je primjenila odredbu člana 19.10. Izbornog zakona BiH. Citirana odredba za navedeni prekršaj propisala je novčanu kaznu u rasponu od 300,00 do 3.000,00 KM, a žalitelju je odmjerena novčana kazna od 500,00 KM. Prilikom izricanja novčane kazne veće od zakonskog minimuma cijenjeno je da je žalitelj kao izabrani član organa vlasti bio dužan upoznati se sa zakonskim odredbama koje regulišu obavezu izabranih kandidata, kao i činjenicu da žalilac neodazivanjem na pozive i nedostvaljanjem izjašnjenja izbjegavao saradnju sa Centralnom izbornom komisijom BiH. Pored navedenih okolnosti cijenjeno je da žalitelj nije ranije kažnjavao i time su, prema zaključku Apelacionog vijeća, raspravljene sve okolnosti relevantne za izricanje adekvatne sankcije.

Na zakonitost odluke o visini novčane kazne bez značaja je navod žalitelja da ima utvrđen status ... i da ostvaruje ortopedski dodatak, jer na ove okolnosti nije ukazao prije donošenja ožalbene odluke, budući da nije iskoristio mogućnost izjašnjenja na upućeni poziv.

Na osnovu iznesenog zaključeno je da je ožalbeno rješenje doneseno nakon pravilno provedenog postupka, da je zasnovano na potpuno utvrđenom činjeničnom stanju i pravilno primjenjenim zakonskim odredbama.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

**PREDSJEDNIK VIJEĆA
SUDIJA
Dinka Bešlagić-Čovrk**